



## **Komunikadu Imprensa**

### **Rejiaun Administrativa Espesiál Oekusi Ambeno (RAEOA)**

**07 Marsu 2024**

#### **JSMP ho Estrutura Suku Lalisuk asina Nota Entendimentu ba serbisu hamutuk liuhosi Programa Apoiu Seguransa Komunitáriu**

Iha 28 Fevereiru 2024, JSMP kontinua haluan nia Programa Apoiu Seguransa Komunitáriu (PASK) liuhosi asina Nota Entendimentu (MoU) ho Suku Lalisuk, RAEOA.

“JSMP agradese ba xefe Suku Lalisuk ho ninia estrutura tomak ne’ebé simu prezensa JSMP nian iha Suku Lalisuk hodi serbisu hamutuk ba programa Apoiu Seguransa Komunitáriu durante fulan neen (6) ba oin, espera katak ho asinatura nota entendimentu ida ne’e bele asegura atividade sira implementa ho di’ak no bele apoiu estrutura suku no comunidade sira asesu justisa inklui apoia ba revizaun no implementasaun regra tara-bandu”, dehan Sra. Ana Paula Marçal, Diretora Ezekutiva JSMP.

Enkuantu Adjuntu Komandante Polísia Eskuadra Pante-Makasar, Sr. Damião da Conceição haktuir katak nia parte prontu atu apoia programa JSMP nian ne’e tanba bele ajuda comunidade sira atu asesu ba justisa, tanba comunidade Suku Lalisuk iha kazu barak liuliu kazu sivil, maibé comunidade sira kuaze nunca informa ba estrutura suku hodi halo mediasaun maibé kazu hotu sira refere ba polísia hodi prosesu tuir justisa formál, tanba tuir comunidade sira nia hanoin katak kazu hotu-hotu tenke lori ba iha tribunál tanba ne’e ho prezensa JSMP nian espera katak bele tulun ita nia comunidade sira hodi bele hatene kona-ba justisa komunitáriu no justisa Nasionál nia lala’ok.

Xefe suku Lalisuk Sr. Hermenegildo Lalisuk iha nia intervensaun haktuir katak nia parte agradese tebes ba prezensa JSMP nian iha Suku Lalisuk tanba tinan barak ona comunidade hein programa ne’e atu bele apoia comunidade sira iha informasaun kona-ba lei ninian tanba comunidade Suku Lalisuk iha kazu barak no kazu hotu-hotu comunidade sira hakarak lori ba tribunál mezmuz kazu balun bele rezolve/tesi iha nivel suku nian. Xefe suku mós fiar katak ho prezensa JSMP nian bele hadia di’ak liután regra tara-bandu Suku Lalisuk nian nune’e bele organiza comunidade sira moris ho di’ak.

Programa ne'e ho objetivu atu tulun komunidadade lokál sira no intervenente sira iha sistema justisa nasional hodi hadia sistema sira ho di'ak no justu hodi ema hotu-hotu bele asesu iha nivel komunitáriu ho atividade hanesan tuir mai:

1. Observa prosesu rezolusaun disputa komunitáriu no hala'o peskiza lokál
2. Fornese informasaun hodi tulun halo revizaun ba iha Regra Tara-bandu
3. Fahe informasaun kona-ba progresu kazu sira hosi polisia, tribunál, prokuradória ba iha suku sira tarjetu
4. Advokasia atu hadi'ak liutan ligasaun komunidadade sira ho justisa formál
5. Fahe informasaun kona-ba asesu ba sistema justisa formál
6. Sei introdús *Case Log* ba Konsellu suku sira no OPS kona-ba oinsa atu priense formuláriu kazu sira

MoU ne'e asina hosi Diretora Ezekutiva JSMP, Sra. Ana Paula Marçal no Xefe Suku Lalisuk, Sr. Hermenegildo Lalisuk no akompaña hosi Jestór Programa JSMP, Sr. Casimiro dos Santos no Komandante Polisia Eskuadra Pante-Makasar, Sr. Damião da Conceição. Enkuantu seremónia ne'e asiste hosi xefe aldeia sira, delegadu/a, representente juventude fetomané, lia-nain no estudante estajáriu UNPAZ.

Atividade ne'e realiza hosi JSMP liuhosi Programa Apoiu Seguransa komunitáriu (PASK), tanba serbisu hamutuk ho The Asia Foundation (TAF) ne'ebé finansia hosi Embaixada Nova Zelandia.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)